

Doch so ha-n-ich's nitt verstande,  
's isch e schlechter Spuck,  
's beste-n-isch, ich bring dr Tante  
Ihre Wecker z'ruck.

---

### Herbst-Rösle.

---

's steht e Rösle ganz allei  
Noch im Gärtle dunte,  
's isch so schön, as hätt's vom Mai  
D'milde Luft noch g'funde;  
Un doch isch dr Herbstwind do,  
Wo druf blost so schadefroh.

Lieblig duftet's un voll Müeth  
Schaüt's in d'Welt noch ine,  
Wie wenn d'Sunne-n-als noch thüet  
Warm ins Gärtle schine;  
Un doch stigt dr Newel kalt  
Jetz scho iwer Feld un Wald.

Rösle, worum bisch so spot?  
Hasch dü dich vergesse?  
Das isch jo di frieher Tod,  
Denn di Zit isch g'messe!  
Boi kunnt d'kalte, starre Nacht,  
Wo kei Bliemle drüs verwacht.

---

### Astronomie.

---

Mr wänn hit vo de Sterne rede;  
So wenig as me kennt dervo,  
So weisst doch Jeder, ass d'Komete  
Sich ziemlich selte säh lehn do.

Se reise-n-ewe so wit umme,  
Ass viel Johrhunderte ha mien,  
Fir wieder züe dr Sunne z'kumme,  
Wo sie derno umkreise thien,  
Un so d'Planete-Bahn durziege;  
Also nitt wit bi uns verbi,  
Fir wieder z'ruck in d'Wite z'fliege,  
Un so Johrhundert üs un i.

Ne so ein isch diemol ku z'fahre;  
Zwe Astronome hän druf g'wacht,  
Die Lit sin Wunderfitz halt, wahre,  
Wänn alles säh, am Tag wie z'Nacht.  
Gar schnell thüet ihr' Komet scho renne,  
Doch thien se noch gar nit vernäh;  
Dr letscht Planet, wo mir jetz kenne,  
Dr « Neptün, » hän se no nitt gsäh;  
Un wie ne kleiner Sterne numme,  
Wo Andre küm als Acht druf gàn,  
Isch ihne d'Sunne-n-erst vorkumme,  
Wenn sie mit blossem Aüg g'lüegt hän.  
Doch bol thien sie jetz observiere  
Dr « Neptün » un dr « Uranüs »,  
Un d'Sunne fangt sich a z'formiere,  
Doch ziemlich klei noch sieht se-n-üs.  
« Jetz geht's doch bol e wenig g'schwinder:  
Dr « Saturn » kunnt mit sine Ring, »  
So rief dr Eint', « o d'Luft wird g'linder;  
Schaü doch das sunderbare Ding!  
Un dert kunnt jetz dr grösst vo Alle,  
Dr « Jüpiter » in sin're Pracht:  
Uf däre Welt thät's mir o g'falle,  
Dert isch doch glichlig Tag un Nacht  
Un glichlig warm durane-n-immer;  
Dert mag noch 's Lewe möglic si.  
Jetz kunnt im « Mars » si rother Schimmer  
Un endlig d'Erde! schäü derthi,